

ce, & principalement celuy qui se faiſt ſur la mer. De là vient le grand ſoulagement du peuple, l'opulence & l'ornement des Republiques. C'eſt ce qui a eſleué l'ancienne Rome à la Seigneurie & domination de tout le monde. Les Venitiens à vne grandeur eſgale à celle des uiſſans Roys. De tout temps il a fait ſoiſonner en richesses les villes maritimes, dont Alexandrie & Thir ſont ſi celebres: & vne infinité d'autres, lesquelles rempliſſent le profond des terres après que les nations eſtrangères leur ont enuoyé ce qu'elles ont de beau & de ſingulier. C'eſt pourquoy pluſieurs Princes ſe ſont efforcez de trouuer par le Nort, le chemin de la Chine, afin de faciliter le commerce avec les Orientaux, eſperans que ceſte route ſeroit plus briefue & moins perilleuſe.

En l'an 1496. le Roy d'Angleterre commit à ceſte recherche Ieā Chabor & Sebaſtiē ſon fils. Enuiron le meſme temps Dom Emanuel Roy de Portugal y enuoya Gaſpar Cortereal, qui retourna ſans auoir trouué ce qu'il pretendoit: & l'année d'après reprenant les meſmes erres, il mourut en l'entreprife, comme fit Michel ſon frere qui la continuoit obſtinément. Es années. 1534. & 1535. Iacques Quartier eut pareille commission du Roy François I. mais il fut arreſté en ſa courſe. Six ans après le ſieur de Roberual